

أيام الطربي هربي

كثيرا ما نسمع هذا المثل الشعبي على لسان كبار السن خاصة نساء أو رجال ومدعاة قوله انك حين تدعى لحفل أو عرس أو ما شابه تقول ذلك لاحقا للاعتذار حيث لا يكون لديك مزاجا لحضور مثل هذه الاجتماعات وللمثل قصة أذكر أني سمعتها من لسان طاعنة بالسن وهي كما روتها :

« راعي من الرعيان كان كل يوم يئعد على حرف صخرة وغنماتو ادام عينو بالسهلة عم ترعى من هالحشيش الأخضر ويوم من الأيام حاطط حالو واعد وشبابتو بايدو عم يسلي حالوا ويدق هالأنغام اللي بتشدي الروح ما لقي غير حية بتطلع ضراعين ونص نسلت من هالوكر وصارت تتلوى ادامو وتترقوص . الراعي من خوفو نهّد حيلو ما ادر يتحرك من محلو وضل عم ينغم عالشبابه حتى مل وانتطع نفسو رجعت هالحية على وكرها وبرمشة عين ردت طلعت وبتمها ليرة ذهب لحشتها لهالراعي وانسلت على وكرا . سناول الراعي هالليرة وعئلوا راح يطير من الفرخ ، ثاني يوم رجع الراعي وبلش عزف بهالشبابه وطلعت الحية ورقصت لتعبت وسناولت ليرة ذهب ولحشتها للراعي ويوم بيوم تعود هالراعي عالحية هوي يدق عالشبابه وهي ترقص وتلحشلو هالليرة . ودارت الأيام والراعي بيوم من الأيام ضعف نادى لابنو وألور روح خود هالغنمات عالمرعى بس ما حكالو شي عن الحية وبالصدفة أعد الولد فوق نفس الصخرة والشبابه بايدو الراعي كان بدو ابنو يعرف القصة لحالو وما لحق الولد يدق أول نغمة على شبابتو حتى انسلت هالحية من وكرها شافا الولد ومن خوفو وثعت الشبابه من ايدو ظنت الحية انو هاد صاحبها الأولاني وأربت ناحو بدا تملود ، بس الولد ياحسرتي سناول هالعصاية وخطا ضرب قطع دنبا آمت الحية لسعتو لسعة كانت فيها المنية وانسلت على وكرا . دري الراعي الأب وأخذ ابنو ودفنو ، وبعد ثلاث اربع تيام رجع عالصخرة ولأنو الذهب بيغري نسي ابنو وبلش على هالشبابه يدق وينطر الحية بركي بترقصلو وبتزللو هالليرة ، متل أول سمعت الحية وانسلت من وكرا وصرخت بالراعي أيام الطربي هربي انته بتتذكر ابنك وأنا بتذكر دنبي ورجعت على وكرا والراعي عم يبكي وينوح راحت الرزّة وراح الولد وكلو بسبب انو باح بالسر يلي بينو وبين الحية ولازم كان ما يخلي ابنو لا يروح ولا يعرف . »

زينة الكلام في دمشق الشام

في الأدب الشعبي الدمشقي

(دار النهضة العربية)

محي الدين قرنفلة

Dialecte syro-libanais : texte 2

أصغت نجوى من وراء جذع سندیانة ضخمة إلى أمّ جميل تقول للمرحوم زوجها :
« الحیاة بعدك صعبة یا حیاتی یا بوجمیل . عم تسمعننی یا بوجمیل ؟ لیش ما
بتبع ورايی ؟ کل الاولاد تزوجوا وصرت وحدي ما لي عازة . شفت ما كنّا نحب البنات .
أنا خصوصي كنت أكره سما البنات . لو كان عندي بنت شو كان ع بالي ؟ لو تشوف أمّ
أنور كيف بنتها بتكرّمها وهي ما بتسوي خمس قروش ؟ مين بطيقها أمّ أنور ؟ الله ما
بيطيقها . ومع هيك الأكلة الطيبة لأمّ أنور . ما في شي بالعالم بتشتهيه نفسها إلا بتقدّم
لها إياه بنتها . في ناس حظها بيفلق الصخر . نحن كنّا شايفين حالنا بالصبيان . أولادنا
طلعوا متل الضراط على البلاط . كلّهم تزوجوا وبیشوفوني ثقيلة عليهم ، وما بيطيقوا
خلقتي . عندهم نسوان الله لا يوريك . حقيقة ما في كنّة بتحبّ حماتها ، والرجل مهما
كبرت شواريه بيصير متل البسين بحضور مرته . أنت وحدك كنت عصيان وأنا على
البركة . لو بتشوف ابنك جميل ! ابنك جميل الله يبارك للجميع تزوج بنت - أجلك
الله من محردي ما بتسوي خمس قروش - ولحق مرته متل دنب الكلب ، وما بيحي على
الضيعة إلا بمواسم التفاح والزيتون ليأخذ حصّته . قرفت من هالحياة ، ومستعدة إلحقك یا
ضو العين یا بوجمیل . إن شاء الله الحیاة عندكم أحسن من هون . يمكن كلّو متل بعض :
زفت بزفت . شو بدّي أعمل ؟ هيك محكوم علينا . ما لي غير الصبر والسلوان »

حليم بركات - «إنانة والنهر»

Dialecte syro-libanais : texte 3

اقتربت أم سليم من قبر زوجها بعدما غطت شعرها الأبيض بمنديلها الأسود وقالت :

« صباح الخير يا بو سليم . كيف حالك اليوم؟ جبت لك معي باقة عطر . شمّ ، شمّ ما أطيب ريحتها . شو بدّي خبرك اليوم؟ في عندي خبر راح يزعلك ويفتح لك جروح قديمة . يا ابن عمّي بخبرك جارنا فهد مات بالمرض الخبيث ، وصار له دفن كبير . ناس كتير حضروا دفنه . لو تشوف قدّيش حضر ناس من صافيتا ومرمريتا . سيّارات وباصات وأمم وخلايق وشو ما بدّك . وفي ناس ما بحياتي شفت وجههم الله لا يوريك حضروا من حمص وحتّي من بيروت مع أنّ الحرب علقانة والطريق خطيرة . المطران نفسه اللّي ما رضي يحضر دفنك إجا على دفنه وصلّى على روحه . شفت الفلوس شو بتعمل ؟ صحيح فهد كان شوبوبيّة ومعروف ، بس المصاري هي اللّي بتحكي . دخلك في مصاري عندكم وبيقدر الواحد بيرطل ليدخل الجنّة ؟ المهمّ نحن شو لنا عليه ؟ الله يرحمه ويرحمك . ما لازم نضلّ نشكي بدون فائدة . إنّ شاء الله وصل لعندك بخير وعافية . بعثت لك معه سلامات على قدّ ما بيقدر يحمل . يا ريت كان بقدرتي ابعت لك كم قرص شنكليش وشويّة تين مغلي وجوز . موسم التين كان ممتاز هالسنة ، ولو تشوف الدالية فوق السطح ! اسم الله ويخزي العين العنقود بلزق العنقود والحبة مزروكة بأختها . بس الأولاد ، وخصوصاً أولاد أختك أكلوا نصّها . ما فيني عليهم . أنا وصيت فهد يخبرك كلّ هالأموور وما في حاجة لكتر الحكي . إنّ شاء الله ما عاد في حاجة للزعل أنت وفهد . الناس بلا ذمّة ودين وكانت تحكي كتير عليه بالباطل ، بالحقّ وبغير الحقّ . شو بعدك بتغار منه ؟ بحلف لك بمار جرجس ، بعدك ما حدا بيعبّي محلّك . بطمّنك أنه ما في حدا جديد ، وقرفت من هالشغلة . بس إذا شفتك ما راح وقرك . نسيت إسألّك . شو عم بتشوف بيّي وأمّي أو بعدك زعلان منهم ؟ الله ، سلّم عليهم كتير السلام . لا تنسَ » .

حليم بركات «إنانة والنهر»

Dialecte syro-libanais : texte 4

- أهلاً، أهلاً وسهلاً بإيمان .
- أهلاً وسهلاً فيك يا عمّي مرشد .
كيف صحّحتك اليوم ؟
- مثل ما شايفة يا عين عمّك ، لا قوّي
تشدّي إيدك . يمكن بعيش هالشتوية .
- بعيد الشرّ . الله يخلي لنا إياك يا
عمّي مرشد . ما فينا نستغني عنك .
- الله يسمع منك .
وقبل أن يترك لها المجال لتتابع حديث
المجاملة معه ، نادى زوجته في الداخل :
- أمّ بهجت ، فنجان قهوة لإيمان .
- لا ، عمّي مرشد . مش قادرة ، عندي
كم شغلة لازم خلّصها . إن شاء الله
بالأفراح .
- إن شاء الله فرحتك ، وقريباً .
بفرحتك بدّي خلّي الحجارة ترقص على
نغمات المجوز .
ضحكت بحياء ، ثمّ تجاهلت الموضوع
وقالت :
- في الواقع جايي وعندي طلب
صغير .
- على قمّة راسي ، بدنا خدمة
لعيونك .
- في عندي خبر كويّس . لو بتعرف
شو ما بتصدّق .
- شو ؟ إن شاء الله خير ؟
- نجوى واصلة بكرا للضيعة هي وفرقة
البرنامج التلفزيوني «تراث الشعب» ،
وبدهم يسجّلوا لك عزف على المجوز .
وياسر النمر بنفسه واصل معهم .
- شو عم تحكي ؟
- والخضر يا عمّي مرشد . اتّصلت
بنجوى من الشام وطلبت منّي رتبّ جلسة
معك أنت وبونايف . شو رأيك ؟
- رأيي رأيك . ما تكرم عينك أنت
ونجوى . في إنسان بيهّمه سمعة الضيعة
أكثر منك ومنها ؟ لا والله .
- خلص ؟
- خلص ، ولو . على قمّة راسي .
- العفو . الله يخلي لنا إياك .
- والقايل .
- نحن منرفع رأسنا فيك .
- العفو يا بنتي . خجلتيني . شهادتك
بألف شهادة .
- شو نسيت أنّ شهادة المرأة بنصف
شهادة ؟
- عندي شهادتك بمئة شهادة رجل .
- الله يديمك .
حليم بركات «إنانة والنهر»

Dialecte syro-libanais : texte 5

محسوبكم جنن كل اللي بقعدوا في القهوة اللي بقعد فيها ، قهوة فلسطين . مع كل خازوق في المفاوضات كنت أوقف وأفقع خطاب . الكل ايصيح علي ويقول بدناش نسمع ، اي إحنا جايين هون عشان ننسى ، لا عين اتشوف ولا قلب يحزن . وأنا سمعان وأخطب وأحرّض . بعدين القهوة بدت تفضي ، وصاروا الزباين يروحوا على قهوة الاكسبرس الامريكاني ، قال هناك اكتشفوا المعسل وبطلوا ايجبوا التبناك العجمي تبع قهوة فلسطين ! قعدني صاحب القهوة وقلّي : ول يا أبو مزبوط ، قطع الأعناق ولا قطع الأرزاق ، واصلاح الحال والاحوال مش رايح ييجي من قهوة فلسطين ، خلينا يا زلي مستورين وعارفين انعيش . قُلت أكيد يا أبو حمدان ، وأنا متأسف على الوضع اللي اوصلناو وعلى هيك ناس . قالّي : أي هدول غلابا ومش حيتان ، الوضع تعبان ويا دوب يعرفوا ايدبروا لحالهم واولادهم الاكله والشربه والنومه ، قول الله إيعين العباد . وبعدين اقترح علي اقتراح ، قال : شوف يا أبو مزبوط ، انتي عندك أنتين حساس للغلط اللي املي البلد . بدل ما تقعد تعمل مواعظ عالقوه ، شو رأيك تكتب في الجريدة مقالات . أي هوي اللي بدو يصلح البلد قعيدة القهاوي . خلي المثقفين اللي بقروا الجرايد يصلحوها .

عجبتني الفكرة ، أي هاي فكره مزبوطه ، بس يعني فكركم في خير بقراية الجرايد ، أي اكرتيتهم يا دوب بقروا الحظ والأموات والاجتماعيات . مع هيك ، يلا ، مش مهم ، خلينا انحاول ، بس انشالله ما نوكل قتله وتتكسر لنا عضمات ، ترى أنا مش لقوه وبتحملش وبلكي حدا يسمع وينصلح الحال .

أبو مزبوط

جريدة الأيام ١١ / ٣ / ٢٠٠١

(عن طريق الإنترنت)

Dialecte palestinien : texte 1

أنا من صغري كاين ورش ، هيك إمّي بتقولّي . دايمًا كاين أنبش بالتراب وأقلبّ الحجار وأنكش في الحارة كلّ احمار . ولما اكبرت شوّيّه صُرت أجنتهم بالدار من كُتر ما اسأل وأحكي واتبع على أغلاط الناس . عشان هيك سمّوني غلباوي من كُتر ما بحشّر حالي في كل إشي .

لما رُحت عالمدرسة و تمّي عها الطريقة ، صاروا الأساترة إينادوا عليّ فيلسوف ، وصُرت عالرايحة والجاي أوكل إكفوف . الأولاد من كُتر ما نكرزت عليهم عيشتهم صاروا إينادوني بعبع . وبعبع صارت بعبجي ، والبعبعجي صارت بحبشي . استاز اللغة العربية والتاريخ كان كل ما فرك داني بالطبشورة يوشوشني وأنا أصيح : «أنت يجب أن يكون اسمك المبحش بن خلخله السلاطيني ، وستموت قتلاً على طريقة موسوليني» .

بعد ما اكبرت صار ا كتير من الناس اينادوني نقّاق ، وفي منهم صار ايقولي أبو زعزوق ، بس تمّت أبو مزبوط مُستعملة أكثر من كل هالنقيبيات أجتني قال لاني حامل السلم بالعرض ، وبتمّني أنتقد ، ومُتهم إني بدّي أربط الكون . ما في حدا بيعرفني إلا ودايمًا ينصحني : ولك يا زلمي حُط راسك بين الروس وقول يا قطاع الروس ... اللي بوخد إمّي هو عمّي ... بوس الكلب من تمّو .. إمشي الحيط الحيط أحسنلك .. ليش حامل السلم بالعرض ... الإيد ما بتلاطم مخرز .. ومن هالحكي ا كتير ا كتير . أنا أهز راسي وأقول ما بصير ، وما بصحّ الا الصحيح ، وهاي العمر مضى وما صحّ الصحيح ، بس أنا عنيد وقال صاحب مبدأ ، ومن ورطه بطلع عشان أدخل بورطه . صُرت ميقل قتلات بعدد شعر الراس ، وبلّشت أسمع همس لما أمرّ في الشارع من الكبار والصغار يقولوا عتي هادا هوّي حُشري أبو القتلات . بس كل هادا مش رح ايهمني ، البلد منكوبه وخربانه ولازم الواحد يتمّو ايقول حتى لو قالوا عنو إنو مجنون .

أبو مزبوط

جريدة الأيام ١١ / ٣ / ٢٠١١

(عن طريق الإنترنت)